

Nunat Avannarliit Killiit Siunnersuisoqatigiiffiata kaammattuutitut aalajangersagaanut nr. 5/2010-mut, matuma kingornatigut allassimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Islandip radio, RÚV, Kalaallit Nunaata Radiua, KNR Savalimmiullu radio, ÚF kaammattorpaat suleqatigiinnertik annertusaqqullugu nukittorsaqqullugulu, nunat pingasut akornanni sanilerisanit nutaarsiassanik ullutsinnilu pisunik aallakaatassianik amerlanerusunik aallakaatitsisoqarsinnaalersillugu. Assersuutigalugu tamanna pisinnaavoq sapaatip akunnikkaartumik qaammatikkaartumilluunniit nunanit allanit nutaarsiassatut suliarisimasat ilaasa aalajangersimasat atorneqartarnissaannik isumaqatigiissuteqarnikkut. Malugeqquneqarpoq taamatut suleqatigiinnerit arlaannaannulluunniit aningaasartuuterpassuarnik kinguneqartariaqanngimmata, tamatumani aallakaatitassianik nammineq suliareriikkanik paarlaasseqatigiittarneq pineqassamat.

(Inatsisartut Nunat Avannarliit Killiit Siunnersuisoqatigiiffianut aallartitaasa siulittaasuat, Josef Motzfeldt)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 5/2010-mik, Inatsisartut tapersiinissaannut siunnersuummut Naalakkersuisut matumuuna qujassuteqarput.

Ukiuni 2010-miit 2014-imut KNR-ip ingerlatsinissamat iliuusissatut maligassiaa naapertorlugu suliffeqarfik tamanut tusagassiinissamat pisussaaffeqartoq nammineq aallakaatitassiarisartakkami saniatigut, nunat inoqqaavisa tusagassiorfiinit soorlu Aboriginal Peoples Television Network (APTN) Canadameersumit aamma 'World Indigenous Television Broadcasting Conference' (WITBC)-meersunik aallakaatitassianik paarlaassinikkut pissarsiaasunik, nalinginnaasumik aallakaatittagassani, ilaartorniarpai. Tamatuma saniatigut KNR imarisaasutigut 'Nordvision'-imut, 'European Broadcasting Union' (EBU)-mut aamma tusagassiorfinnut allanut paarlaassueqatigiinnissamat periarfissaqarpoq.

Manna tikillugu KNR-ip iluatsilluartumik aallakaatitassiat pinngortitamut tunngassut, nunani avannarlerni TV-kkut suleqatigiiffik 'Nordvision' aqqutigalugu paarlaassueqatigiinnikkut pissarsiarineqartartut, aallakaatittareerpai aammalu KNR-ip pinngortitaq pillugu aallakaatitassiai arlallit nunani avannarlerni aallakaatinneqartareersimalerput.

Taamatuttaaq KNR Canadami tusagassiortoqarpoq.

Nunat Avannarliit Killiit Siunnersuisoqatigiiffiata kaammattuutitut aalajangersagaa nr. 5/2010 nutaarsiassanik tamakkunungalu paasissutissanut tunuleqtsersuutitut aallakaatitassianik paarlaasseqatigiissinnaanermut tunngassuteqartoq KNR-ip iliuusissatut maligassiaata annertusarneqarnissaanut tulluuppoq.

Pissusissamisoorpoq nutaarsiassanik aallakaatitassiallu imarisaannik nunanut avannarlernut killernut allanut Island-imut Savalimmiunullu paarlaasseqatigiittarnissaq taamatullu iliuuseqarumalluni nalunaarutinut KNR akuersorluni nalunaaruteqarsimavoq.

Nutaarsiassanik paarlaasseqatigiinneq ajornannginnerpaavoq radiomili TV-milu aallakaatitassianik piffissami sivisunerusumi aallakaatittariaqakkanik paarlaasseqatigiittarneq akisuneruvoq tassami

radiomi TV-milu tamakkua kalaallinut nuannaarutissatut aallakaatinneqartinnatik oqaasertamikkut suliareqqaartariaqartarmata. – KNR-imiit assersuutitut taaneqarsinnaavoq KNR TV-p ukioq manna aallakaatitassiat tuluttut oqaasertallit pingasut tamarmik minutsinik 28-inik sivisussusillit aallakaatissimammagit taakkualu aallakaatinneqannginnerini oqaasertaasa nutserneqarnerinut, oqaasertaliunneqartut immiunneqarnerinut, oqaasertalersuutillu immiussinermi qallerneqarnerini teknikkikkut iluarsartuussinernut katillugit 58.000 kr. aningaasartuutaasimammata.

Naalackersuisut suleqatigiissutit tamakku nuannaarutigeqaat nunarsuarmimi sumiiffinni allaniit pissutsinik nalunngisassatsinnik ammaassortarmatigut aammalu periarfissittarluta nunatsinni pissutsinik inuiannut allanut saqqummiussuinissatsinnik.

Aningaasaliissutitut tunniunneqartut iluini, nunanit avannarlerniit nutaarsiassanik aallakaatitassianillu, qanoq iliornikkut qanorlu annertutigisumik, saqqummiussuisarnissaq KNR-ip nammineerluni ilusilersorniagassarissavaa.

Taamatut oqaaseqarlunga siunnersuutip akuersarneqarnissaa Naalackersuisuniit innersuussutigaa.